

VENDIM
Nr. 939, datë 9.10.2013
PËR PËRCAKTIMIN E FUSHËS SË PËRGJEGJËSISË SHTETËRORE TË MINISTRISË SË
BUJQËSISË, ZHVILLIMIT RURAL DHE ADMINISTRIMIT TË UJËRAVE

Në mbështetje të nenit 100 të Kushtetutës dhe të pikës 2 të nenit 5 të ligjit nr. 90/2012 “Për organizimin dhe funksionimin e administratës shtetërore”, me propozimin e Kryeministrit, Këshilli i Ministrave

VENDOSI:

- I. Miratimin e misionit, të fushave të përgjegjësisë shtetërore të Ministrisë së Bujqësisë, Zhvillimit Rural dhe Administrimit të Ujërave dhe të kompetencave në përmbushje të tyre, sipas përcaktimeve të këtij vendimi.
- II. Ministria e Bujqësisë, Zhvillimit Rural dhe Administrimit të Ujërave ka për mision zbatimin e programit politik të Këshillit të Ministrave në fushat e bujqësisë, zhvillimit rural, sigurisë ushqimore e mbrojtjes së konsumatorit, administrimit të ujërave, peshkimit dhe akuakulturës.
- III. Për të përmbushur misionin e sipërpërmendur, në përputhje me Kushtetutën e Shqipërisë dhe legjislacionin në fuqi, Ministria e Bujqësisë, Zhvillimit Rural dhe Administrimit të Ujërave ushtron këto kompetenca:
 1. Harton dhe zbaton politikat shtetërore për çështjet e bujqësisë, zhvillimit rural, sigurisë ushqimore e mbrojtjes së konsumatorit, administrimit të ujërave, peshkimit dhe akuakulturës.
 2. Përgatit strategjitë, planet kombëtare të veprimit, programet dhe aktet ligjore e nënligjore për fushat e veprimtarisë që mbulon, si dhe siguron zbatimin e tyre.
 3. Ndjek me përparësi proceset integruese dhe bashkërendon punën për bashkëpunimin ndërkombëtar për fushat që mbulon, në përputhje me politikën e jashtme dhe të zhvillimit të vendit.
 4. Kujdeset për përafrimin e legjislacionit në fushat e bujqësisë, zhvillimit rural, ushqimit e mbrojtjes së konsumatorit, administrimit të ujërave, peshkimit dhe akuakulturës me normat dhe kërkesat e Bashkimit Evropian dhe strukturat përkatëse, si dhe vlerëson nevojat e planifikon fondet e nevojshme për përmbushjen e tyre.
 5. Harton dhe zbaton politikat orientuese, mbështetëse dhe nxitëse për prodhimin bujqësor e blegtoral, si dhe kujdeset për zhvillimin e koordinuar të bujqësisë.
 6. Ndjek me përparësi përgatitjen e strukturave të saj për menaxhimin e decentralizuar të fondeve të Komisionit Evropian për Zhvillimin Rural në përputhje me aktet rregullatore të Bashkimit Evropian.
 7. Përcakton politikat dhe zbaton mbështetjen financiare të qeverisë për fermerët dhe agrobizneset bazuar në politikat e programit të qeverisë për mbështetjen e tyre.
 8. Kujdeset për konsolidimin dhe miradministrimin e tokës bujqësore, si dhe mbrojtjen e tokës nga proceset natyrore dhe faktorët e tjerë që mund ta dëmtojnë atë.
 9. Kujdeset për ngritjen dhe menaxhimin e sistemeve të ujitjes e të kullimit, si dhe merr masa të përshtatshme për mbrojtjen e tokave nga përmytjet.
 10. Harton dhe zbaton politikat për sigurinë ushqimore, cilësinë e produkteve ushqimore, duke përfshirë gjithë zinxhirin ushqimor nga ferma në tavolinë.
 11. Kujdeset për mbrojtjen e të drejtave të konsumatorit lidhur me produktet ushqimore të vendosura në treg.
 12. Harton dhe zbaton politikat për shëndetin e kafshëve e të bimëve, si dhe për garantimin e shëndetit të njerëzve nga sëmundjet që rrjedhin prej tyre.
 13. Siguron, administron dhe shpërndan informacionin bujqësor, duke vendosur një marrëdhënie të qëndrueshme dhe bashkëpunuese me fermerët. Kujdeset për transferimin e teknologjive bujqësore dhe planifikon zbatimin e teknologjive të reja.

14. Bashkërendon punën me strukturën e shërbimit këshillimor për dhënien e informacionit dhe për mundësimin e trajnimeve për fermerët e operatorët e biznesit ushqimor dhe kujdeset për fuqizimin e këtij shërbimi në përputhje me rekomandimet e BE-së.

15. Harton dhe zbaton politikat shtetërore për peshkimin dhe akuakulturën në Shqipëri, menaxhimin e burimeve peshkore dhe përafrimin e akteve ligjore e nënligjore me kërkesat dhe legjislacionin përkatës të Bashkimit Evropian.

16. Harton dhe zbaton politikat për marketingun agrar dhe agropërpunues. Përgatit strategji dhe projekte, duke bashkëpunuar edhe me organizma ndërkombëtarë për analizimin e zhvillimin e shkëmbimeve tregtare dhe sidomos për rritjen e eksportit të produkteve shqiptare.

IV. Ngarkohet Ministria e Bujqësisë, Zhvillimit Rural dhe Administrimit të Ujërave për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI

Edi Rama